



الحمد لله وأشهد أن لا إله إلا الله وحده لا شريك له، وأشهد أن محمدًا عبده ورسوله صلى الله عليه وسلم، أما بعد

أهلاً ومرحباً بكم في لقاء لايف جديد، بعنوان:

⑥ كيف نحفظ القرآن وما الذي يساعد على

تيسير مراجعة القرآن

اللي حافظ واللي حافظ من زمان ونسى يعمل ايه؟ والحاجات محفوظة وحاجات ساقطة يعمل ايه؟ قصص كثير هنتكلم عنها النهاردة.

بس خليني أبدأ الأول بحديث كلنا حافظينه،
هخدم به نقطتين، وبعد كده نرجع للنصايح.

الحديث المشهور جدًا اللي فيه يقال لصاحب
القرآن : "اقرأ وارْتَقِ ورْتِّل"، صح؟ "فإنَّ
منزلكَ عندَ آخرِ آيةٍ تقرأُها"

كلنا عارفين الحديث ده مشهور أوي وبيتقال
دائمًا في فضل القرآن "يُقالُ لصاحبِ القرآنِ
اقرأ وارْتَقِ ورْتِّل كما كنتَ ترتِّلُ في الدُّنيا فإنَّ
منزلكَ عندَ آخرِ آيةٍ تقرأُها"

الراوي : عبدالله بن عمرو | المحدث : الألباني
| المصدر : صحيح أبي داود الصفحة أو
الرقم: 1464 |

خلاصة حكم المحدث : حسن صحيح،
الحديث ده خلي بالكم موجه لاتنين:

❁ الموجه الأول:- للي حافظ وناسي وقاعد

يعزي نفسه -أنا حافظ/ وأنا كنت حافظ بس ما
براجعش فأنا ناسي كثير- فلما بيسمع الحديث
ده بيتخيل المسكين إن هو مع الناس اللي
حافضة في الحديث ده لا، أنت بتتكلم دلوقتي
اقرأ وارتق ورتل، أنت مش هتبقى ماسك
مصحف ولا معك حاجة تبص فيها ولا
هتعطى فرصة للمراجعة، ولا هتبص في
حاجة ولا هيبقى في ريكورد شغال جنبك
وأنت بتقول معه وخلاص لا لا لا مع نفسك،
اقرأ واللي هتقرأه خلاص واللي هتقف هتقف،
فيا حسرة من حفظ ونسي! ويا حسرة من لا
يهتم بالمراجعة أصلاً... وقاعد يمني نفسه
يقول له حوالي عشرة أجزاء، عشرين جزء
طب ايه بقى؟ ايه بقى؟ قل الأعراف. لا لا

عايز أراجع قل الأنعام، لا لا لا دي عايزة
أسبوع مراجعة، طب يلا قل النساء لا لا لا
النساء لأ انسى النساء دي عايزة حفظ من أول
وجديد، طب أنت بتعمل ايه هنا؟

أنت متخيل هتبقى في الموقف ده هتقرأ عادي
كده وتطلع عادي!

ربنا هيساويك باللي بيراجع كل يوم ويجيب
بالجزئين والتلاتة والأربعة بيموت نفسه
مراجعة؟! هيساويه بواحد حفظ القرآن زمان
وحفظ يعني مشي حالك وبعد كده ما بيراجعش
خالص! لا يستوون عند الله، الله -سبحانه
وتعالى- عدل، أنت مثلاً كنت حافظ البقرة وآل
عمران والنساء والأنعام والأعراف والكلام
ده، بس أنت اللي فاكره البقرة وبعد كده الباقي
كله بيقع، منزلتك عند آخر آية تقرأها قرأت

خلاص وقفت جيت بقى في آل عمران الدنيا
وقفت معك خلاص حتى لو دخلت الجنة تقول
لي طب ما الجنة حلوة أكيد حلوة أي حد يخش
الجنة حاجة حلوة بس تخيل أنت الفرق بينك
وبين اللي حفظ معك في نفس الحلقة، وكان
بیراجع بقى وایه مراجعة فظیعة جدًا وما
بینساش حرف لقیته بقى جاب ایه؟

زي ما أنتم مثلاً أنتم الاتنين وصلتموا للأنفال،
أنت وقفت بقى البقرة آل عمران مش قادر
أكمل، هو بقى جاب النساء والمائدة والأنعام
والأعراف ويونس يعني ایه الدنيا ماشية معه
والأنفال والتوبة وکمل ما شاء الله، تخيل بقى
حسرتك وأنت شايف واحد بيعديك ياريت
منزلة ولا في منزلتين ولا في ثلاثة لأ ده
ممکن یعدیک بألف منزلة، ألف منزلة! هو

القرآن كم آية يا جماعة؟ القرآن ستة آلاف
مئتين ستة وثلاثين آية. (٦٢٣٦)

يعني منزلتك عند آخر آية يبقى الآية بمنزلة،
تخيل أنت واحد بيعديك بألف منزلة، ألف
منزلة! مع إنك كنت حافظ، بس أنا ايه بس أنا
نسيت وهو ما نساخ فأننا قرئت ٢٠٠ آية، هو
قرأ ألف ومئتي آية.

أنت متخيل حسرتك عاملة ازاي؟ متخيل ألمك
هيبقى عامل ازاي؟ آه لما نخش الجنة خلاص
ربنا هيشيل منا الألم والحزن، لكن قبل ما
تخش هتبقى متحسر. والحسرة اللي يوم
القيامة هتوصل للمؤمنين اللي هيخشوا الجنة
بس قبل ما يخشوها، هيتحسروا إنهم لم
يزدادوا، هيتحسروا على منازل كان ممكن
يوصلوا لها ما وصلوهاش، بعد كده أكيد بعد

ما الناس تدخل الجنة مفيش في الجنة ألم ولا
ولا حسرة ربنا هيزيله ويراضي كل واحد
بمنزلته وخلاص. بس آا كان فيه أحسن، كان
فيه أحسن بس أنت وقفت! وقفت كده، فدي
رسالة مؤلمة سامحوني رسالة مؤلمة موجهة
للي بيحفظ وخلاص ومش بيراجع.

✿ **الرسالة الثانية:-** اللي حفظ زمان ووقف
حفظ مش مشكلة إنك توقف حفظ بس الكارثة
إنه وقف مراجعة، لو أنت ماحفظتش جديد
أهون عندي.

يعني لو أنت ماحفظتش جديد أهون عندي من
إن أنت تكون حفظت ونسيت، لأن حفظته
ونسيت طب أنا حفظته خلاص، ليه أنساه؟
ليه؟ تمام! فدي الرسالة الأولى.

الرسالة الثانية اللي بيقدمها الحديث ده، بيقدمها
بقى للي ما حفظش أصلاً، اللي ما بيحفظش
أصلاً، يعني أنا متأكد إن فيه ناس دلوقتي
بتسمعني بيقلوا -وهتقلوا لي آه أو لأ معلش
يعني خليك صُرحا معي- في ناس دلوقتي
بيسمعوني في اللايف ده بيقلوا: ايه ده هو
الناس دي بيتكلموا في ايه؟ ايه المستويات دي؟
أنتم بتتكلموا في منازل الجنة؟ ايه ده أنتم
بتتكلموا في ألف منزلة و ألفين منزلة؟ هو أنا
حضرتك أنا مبحفظش قرآن أصلاً، أنتم فين يا
جماعة؟ هو أنتم فين؟ أنتم دخلتم الجنة
وبتتكلموا جوّه؟ احنا طبعًا مش بتكلم إن احنا
ضامنين جنة، بس أنا عايز أقول لك في واحد
دلوقتي قاعد معنا: ايه ده؟ هو الناس دي فين؟
الناس دي بتكلم على جوّه الجنة وفي ألف

منزلة وألفين منزلة؟ أنا ما بحفظش أصلاً، ما
بتحفظش أصلاً! أنت لازم تحس إن أنت فايتك
كثير، فايتك كثير! فايتك كثير وأجر رهيب،
وسهل وميسر وجميل ومحبوب للنفس، وكل
الناس بتحبه، وأنت في غفلة عنه! ليه؟ على
فكرة، عارف أنا لو بقول لك مثلاً بطل أغاني،
بطل إباحية، بطل بنات، بتبقى ثقيلة على قلبك،
صعبة تقول لي أصل و..، لكن معش هو حفظ
القرآن مين اللي ما يحبوش؟

يعني يا أخي، لما نيجي حتى نعمل طاعات
ونترك معاصي، أحياناً بيبقى فيه طاعة ثقيلة
على القلب، وفيه معصية صعب أسببها، دي
ممكن بناخد فيها وقت، لكن عايز أسأل سؤال
يعني: -مع إحترامي- طاعة، وهي أصلاً
محببة، وهي أصلاً مفيش حد بيكرها خالص،

ومش ثقيلة على القلب، ليه ما بتعملهاش؟ ليه
ما بتحفظش؟ ايه المانع؟ أصل أنا حفظي
ضعيف، احفظ كمية قليلة، أصل أنا ما عنديش
وقت، احفظ كمية قليلة، هنقول دلوقتي الكمية
القليلة دي ممكن توصلك لايه في قد ايه -مع
احترامي- أنا بكلمك في حاجة مفيش مسلم
مايحبهاش! مين ما بيحبش يحفظ قرآن! ويا
ريتني بقول لك احفظ قرآن عشان تاخذ شوية
حسنات، لأ، ده جبال جبال من الحسنات،
فضلاً عن منازل -منازل رهيبة يا جماعة-
أنتم عارفين النبي ﷺ - بيقول: "في الجنة مائة
درجة ما بين كل درجتين كما بين السماء
والأرض ، والفردوس أعلاها درجة ، ومنها
تُفَجَّرُ أنهارُ الجنة الأربعة ، ومن فوقها يكون
العرش ، فإذا سألتُم الله فاسأله الفردوس"

الراوي : عبادة بن الصامت | المحدث :
الألباني | المصدر : صحيح الترمذي

كما بين السماء والأرض! لذلك العلماء -
بعض العلماء- قالوا إن منازل بعدد آيات
القرآن، لأن هم اعتبروا إن مفيش حد هيبقى
في الجنة أحسن من الخاتم اللي بيعمل بالقرآن،
مين اللي هيعديه! وبالتالي أنا ممكن أعمل
عمل صالح يشفع لي عند الله، آه أنا مقصر في
حاجات، بس يا رب هحفظ قرآن، آه أنا مش
قد كده في حاجات معينة، بس هاجي لربنا
حافظ قرآن بجد وبعمل به، لأ هتفرق معك
كثير، أنت ليه زاهد في منازل الجنة؟ ليه زاهد
في شفاعة القرآن؟ يعني ما أنت محسنا يعني
أنا لا أنا مش عايز أكون بكلم الناس
الحافظة، لا أنا عايز دلوقتي أشوف الناس اللي

مبتحفظش، ما بتحفظش ليه؟ أنت مستني ايه؟
العمر بيعدي والذاكرة بتضعف، والوقت
موجود ما تضحكش على نفسك، معلش أنا
أسف في الكلمة اللي هقولها دي، احنا لو بنقعد
على المصحف قد ما بنقعد على الفيسبوك
وتويتر والواتساب ومقاطع التيك توك والريلز
بتاعة الفيسبوك و الشورتس بتاعة اليوتيوب،
احنا كان زماننا حفظنا القرآن في ست شهور،
أنا بقول كلام بأفور؟ ولا ده كلام حقيقي؟ لو
بنقعد على القرآن حفظ ومراجعة، بقدر الوقت
الذي نقضيه على تقليبة الفيديوهات في التيك
توك وتقليبة الفيديوهات في الفيس وتقليبة
الفيديوهات في اليوتيوب، وهري الواتساب
وهري الفيسبوك وهري الجروبات، احنا كان
ممکن نختم في سنة، سنة تنقلك من شخص

محفظتش قرآن قبل كده إلى حافظ، خاتم ختمة
جامدة -مش ختمة أي كلام- ختمة قوية، ما
تش تغانيش وما تش تغلش نفسك، وأنت مش
هتبقى معذور، آه ما نقولش حفظ القرآن
واجب، بس ده عليه أجر رهيب وسهل وميسر
وجميل، أنا فين من الدنيا دي؟ تمام! حافظ
القرآن يا جماعة أسعد الناس بالله، أكثر واحد
بيذكر ربنا حافظ القرآن اللي هو بيحتاج
يراجع كل يوم جزء وجزئين، بيضطر يذكر
ربنا كثير، حافظ القرآن أسعد الناس بالثواب،
ليه؟ لأن هو كل يوم بيحفظ، فلو بيحفظ صفحة
مثلاً، هيضطر يقرأها مثلاً عشرة عشرين مرة
عشان يحفظها، ولو بيراجع، هيراجع جزء
جزئين مثلاً هيقرأ له كمان قول عشرين
صفحة مثلاً على الأقل، يبقى حافظ القرآن

بيقرأ في المتوسط في اليوم أربعين صفحة!
ليه؟ هيحفظ صفحة النهاردة فعشان يحفظها
هيقراها مثلاً عشرين مرة، يعني على ما
يجيبها كده ويلمها هتقرأ منه مثلاً عشرين مرة
عشان يثبتها، عشان ايه يثبتها ، كأنه قرأ
عشرين صفحة ، يعني كأنه عشان يحفظ
صفحة ، كأنه قرأ جزء ؛ لأن الجزء عشرين
صفحة، وهيراجع بالتوازي جزء على الأقل،
هيجيب عشرين صفحة كمان، يعني بنتكلم في
واحد هيجيب في المتوسط - غير القراءة- ده
، ده الحفظ والمراجعة بس لو قعد يقرأ مثلاً
ممكن يقرأ جزئين لأ، ده احنا هنتكلم إن هو
بيحفظ وبيراجع بس، لو حفظ وراجع بس
هيبقى علاقته بالقرآن لا تقل عن أربعين

صفحة في اليوم، أربعين صفحة في اليوم، لو
هو بس حفظ ومراجعة.

طب لو قلنا إن تعال بقي نحسبها عشان نشوف
الدمار ، تعال نحسبها عشان نشوف الدمار ،
هو الحرف بكام حسنة يا جماعة ؟ "من قرأ
حرفاً من كتاب الله فله به حسنة ، والحسنة
بعشر أمثالها لا أقول ألم حرف ، ولكن ألف
حرف، ولام حرف، وميم حرف"

الراوي : عبدالله بن مسعود | المحدث :
الألباني | المصدر : صحيح الترمذي.

والحرف بعشرة حلو ؟

يبقى الحرف بكم حسنة ؟ بعشرة

طيب الصفحة فيها كم حرف؟ تعال، نحسب
هي الصفحة فيها كم سطر؟ فيها خمسة عشر
سطر، حلو.

كل سطر فيه كم كلمة؟ في المتوسط ثمانية
كلمات - في المتوسط ثمانية كلمات.

يبقى في كم كلمة في الصفحة؟ خمسة عشر
في ثمانية، كم كلمة؟ مائة وعشرون كلمة.

طيب متوسط عدد الحروف في الكلمة كم؟
خمسة حروف، يعني في كلمة ثلاثة حروف،
وكلمة أربعة، وكلمة ستة، وكلمة سبعة.

نقول متوسط عدد حروف الكلمة خمسة
حروف.

مائة وعشرون في خمسة بكام؟ بستمئة -
ستمئة - والحرف بعشرة، أضرب في عشرة

يبقى احنا بنضرب خمسة عشر في ثمانية في
خمسة في عشرة. يطلعوا كم ؟ ستة آلاف
حسنة في الصفحة -أقل حاجة والله يضاعف
لمن يشاء- بس احنا هنتكلم في الحد الأدنى،
إن أنا بس قرأت صفحة، ستة آلاف حسنة،
يعني أنا لو بقرأ الجزء الواحد يبقى أضرب
في عشرين ، هضرب في عشرين، يعني
هوصل مئة وعشرين ألف حسنة -مئة
وعشرين ألف حسنة في الجزء- واحنا قلنا
إن الرجل اللي بيقراً قرآن وبيراجعه وكده
على الأقل هيعدي على جزئين في اليوم،
يعني بنتكلم في ربع مليون (مئتين و أربعين
ألف)، ربع مليون حسنة لو أنا علاقتي

بالقرآن بس بحفظ صفحة في اليوم وبراجع
جزء.

ربع مليون حسنة بتفوتك يا اللي مش منشغل
بحفظ، أصل أنا ما بعرفش أحفظ، أصل أنا
حفظي ضعيف، أصل أنا ما عنديش وقت، لأ
أنا كنت بشوف في الدار ناس عندهم سبعين
وثمانين سنة، في سيدة ختمت القرآن و عندها
ثمانين سنة.

"خَيْرُكُمْ مَنْ تَعَلَّمَ الْقُرْآنَ وَعَلَّمَهُ"

الراوي : عثمان بن عفان | المحدث : الألباني
| المصدر : صحيح الترمذي

أنت منين؟ أنت فين من الحثة دي؟ فين؟
امتى هتتال الخيرية دي، ما عشان تعلمه لازم
تتعلمه، أنت ماتعلمتهوش، هتتال الخيرية

امتى؟ اتحفز كده اصحى معايا، اصحى معايا،
أسعد الناس بتدبر القرآن، -معلش مع احترامى
لكم- لما بتدخلوا معي دورة، مثلاً دورة تدبر
سورة النور، دورة تدبر سورة الحجرات،
دورة تدبر سورة مريم، طه، اللي مش حافظ
السورة بتحس بايه، بتحس إنك أنت غريب،
تحس إن فيه فجوة بيني وبين الكلام، هو أنتم
بتقولوا الكلام ده ازاي؟ هو أنتم بتفهموا
القرآن ده ازاي؟ ما هو احنا بدأنا بحفظ، فلما
حفظنا الحفظ مثلاً ايه بقف في آية، بقف في
كلمة، ببص لمعناها، ببص للتفسير، الدنيا
فتحت، والقرآن ايه **{إِنَّ هَذَا الْقُرْآنَ يَهْدِي لِلَّتِي**
هِيَ} ايه؟ {أَقُومُ} الإسراء (9).

طب أنت أصلاً مش موجود، أنت ما فكرتش
تحفظ، فأنت قاعد في الدورة كلها منبهر بس

ايه ده، أنتم ازاي بتقولوا الكلام ده؟ أنا حاسس
إن أنا بعيد أوي ، ما احنا بدأنا حفظنا، بعد ما
حفظنا حاولنا نكسب، بعد ما فهمنا ربنا بيفتح
بتدبر ، وبعد كده بتشوف النتيجة تمام؟

فأسعد الناس بالعلاقة مع القرآن هو الحافظ؛
لأن الحافظ ده بايه بيتدي بقي ايه ربنا
بيكرمه، عايز أفهم، عايز اقرأ، عايز أشوف
تجويد، عايز أعرف معاني كلمات، كله بقي
بيترتب بس في الأول في ايه؟ في الأول فيه
حفظ.

طيب حافظ القرآن يا جماعة ده ليه عنده
ميعاد مميز يوم القيامة؟ وده للي حافظ يعني
يعني ميعاده المميز غير اقرأ وارتق ورتل ،
لأ في ميعاد ثاني، أهم ميعاد، أهم ميعاد في
حياتك، أهم ميعاد في حياتك! ايه أهم ميعاد في

حياتك؟ أهم ميعاد في حياتك، هو هتقابل مين وأنت طالع من القبر، هتقابل مين وأنت طالع من القبر.

ده أهم ميعاد في حياتك، الميعاد اللي أنت ما تعرفش مين هيقابلك، أنت وأنت طالع من القبر كده انشق عنك القبر، إما هتقابل حاجة تظمنك أو هتقابل حاجة تخوفك، الناس كلها مفزوعة، فيه واحد هيجيله رسالة، هتخليه يهدى خالص، و واحد في واحد أول ما يطلع من القبر هيقابل رجل، يقول له: من أنت؟ يقول: أنا، صاحبك القرآن، أنا صاحبك القرآن الذي أسهرتُ ليلك، كنت قاعد تحفظ، تقعد تسهر تحفظ، تقعد تسهر تراجع، تقعد تسهر تقوم الليل عشان عشان تثبت الورد، تقعد تسهر على كتب التفسير عشان تفهم، تقعد

تسهر تسمع تجويد وتذاكر تجويد، أنا صاحبك
القرآن أسهرت ليلك واضمأت هواجرک، کمان
كنت بتصحى صائم كنت بتصوم النهار عشان
ربنا يبارک لك، قال وإنی لك من وراء كل
تجارة، فيعطى الملك بيمينه والخلد بشماله ملك
وخلد، ويكسى والداه حلتان لا تقوم لهما الدنيا،
ويوضع على رأسه تاج الوقار -ويوضع على
رأسه تاج الوقار، ويكسى والده حلتان لا تقوم
لهما الدنيا-، أبوه وأمه في حنة تانية، مرة
واحدة يجدوا نفسهم لابسين ايه؟ ايه ده؟ ايه
اللي جابنا هنا؟ ايه الجمال ده؟ احنا لابسين كده
ليه؟ يقال بأخذ ولدكما القرآن، معك هدية
جميلة تقدمها لوالدك ووالديك، حتى لو ماتوا،
عايز أنا أبرهم بعد موتهم، طب ما يلا احفظ
القرآن، وأديهم أجمل هدية في حياتك وأحسن

بر في حياتك احفظ قرآن، تأخذ تلبس تاج
الوقار ملك خلد أبويا وأمي يعدوا يوم القيامة
بسببي، دي حاجة تفرحني، دي حاجة
تسعدني، ده أعظم البر، أعظم البر على
الإطلاق ولد يحفظ القرآن، المهم يعني اه شفت
بقى سامحوني الرسالة ايه؟ جامدة شوية إني
دخلت شمال في اتنين.

دخلت شمال في واحد، قعد يحفظ بس ما
بيراجعش، أو حفظ من زمان وانتتهت علاقته
بالقرآن من زمان، كنت باحفظ في الجامعة،
كنت باحفظ من زمان من ساعة ما خلفت
العيال ما بقتش احفظ، أنا من ساعة ما
اتجوزت الدنيا باظت أنا بقی بشتغل شغلانتين
صبح وليل فانتتهت علاقتي بالقرآن أنا نسيت
اللي أنا حافظه تعال لي.

التاني بقى اللي هو أصلاً مش معانا يعني أنت
مش موجود أنت فين من الدنيا دي احنا بنتكلم
بس بايه بنراجع أنت فايتك كثير أوي، لو ما
بتحفظش أنا عايز قرار النهاردة يا جماعة
اللايف ده لو خلص من غير قرار يبقى ملوش
لازمة لو أنت مش دلوقتي خلاص في دماغك
بعد ما أقفل اللايف دلوقتي هتكلم مين؟
هتكلم مين؟ مين السكة اللي هبدأ بها الحفظ
هتكلم مين؟ مين السكة اللي هبدأ بها الحفظ
هتكلم مين؟ مين السكة اللي هبدأ بها الحفظ
معه، هروح هرجع الدار هعمل جدول
مراجعة في أخ في المسجد جنبى كان بيقول
لي احفظ أنا هنزل من بكرة ابتدي احفظ معه،
ما الدار جنبى أنا ما بروحش ليه؟ بتدلع ليه أنا
بقى لي سنين كل شوية يقول اروح ما
بروحش ليه؟ أنا هبتدي أراجع مع نفسي لو ما

طلعتش من اللايف ده بقرار بيقى أنا على
الدنيا السلام، بيقى أنت هتبقى من الناس اللي
بيقعدوا يسمعوا كده مواعظ وخلص ومع
السلامة مفيش ايه؟ مفيش استجابة.

طيب تعالوا إن احنا ايه؟ هقول لكم شوية
نصايح، نصايح عشوائية، يعني مش ضروري
تكون مرتبة، بس هي كل نصيحة هتنزل عند
واحد فيكم كل نصيحة من اللي أنا هاقولها دي
غالبًا هتحل مشكلة عند واحد فيكم وكل واحد
هيالقي نفسه في النصايح دي، طيب احنا قلنا
خلينا نقول السؤال الأول إن احنا ليه ما
بنحفظش قرآن؟

❁ عندي ثلاث أسباب لعدم حفظ القرآن

أشهر ثلاث أسباب:

❁ واحد ضعف الإرادة.

❁ اثنين عدم وجود خطة للحفظ.

❁ ثلاثة عدم وجود محفظ.

❁ ليه ما بتحفظش؟

عايز بس ما بيحصلش، نفسي والله يا عم
الشيخ كل ما تقابله في الشارع أنت فين يا
ابني؟ ليه؟ والله يا شيخ نفسي أجي نفسي أجي،
آه الأخت تقابل أختها أنت فين؟ ما بتجيش
الدار ليه؟ والله يا أختي المعلمة أنا نفسي أجي
لك والله، نفسي أجي لك بس ما ظروف بقى
ماشى. بيفكرني بكلمة الأبرص والأقرع

والأعمى، الأبرص والأقارع في القصة
الحقوق كثير، ما تضحكش على نفسك ما
تضحكش على نفسك في وقت دائمًا في وقت.

طيب ضعف الإرادة ده هو ده اللي أنا عالجته
من أول اللايف، فهمتوا ليه أنا بدأت البداية
دي أنا خلصت المحور الأول خلاص، ضعف
الإرادة سامحوني الكلام الشديد اللي أنا قلته
من شوية لكم كلكم، أنا كنت بحل دي خلصت
دي خلاص خلصت، كلكم دلوقتي قاعدين
بتتأسفوا في الكومنتات أنا شايف في دموع
وفي ايموشنز عياط، وفي فعلاً يا شيخ أنا
خلاص أنا كده الغرض حصل شكرًا بدأ فيه
مجموعة من اللي يسمعي دلوقتي الكلام
الناشف اللي أنا قلته من شوية معلش ما كنش
فيه غير كده، بدأ أه يحيي الإرادة تاني في حد

هنا هيكتب دلوقتي في طب ما ايه رأيك أن هو
يكتبه دلوقتي؟ دلوقتي أنا عايز فيه ناس لسه
ضعيفة الإرادة هيشجعها ناس دلوقتي هتكتب
كومت أنا أخذت قرار أصلاً خلاص، يعني
يعني الربع ساعة اللي أنا سمعتها دلوقتي دي
أنا حسيت أن أنا يعني فقت أنا خدت قلمين كده
أنا فعلاً أنا فعلاً لازم أنا خلاص خدت قرار،
فيه ناس مستتية تشوف قدوة دلوقتي ناس خدوا
قرار أنا هرجع لورد المراجعة من بكرة
النهاردة أنا هبتدي احفظ أنا عارف احفظ ازاي
بس أنا بتدلع لا مؤاخذه، أنا عارفة هعمل ايه
بس فعلاً كان في ضعف أنا كنت مستتية حد
يقول لي الكلمتين،

القرآن كم ربع؟ يلا قولوا: القرآن كم ربع؟
مش هكمل لايف لو ماحدش قال القرآن كم
ربع؟ تمام القرآن الجزء فيه "ثمان أرباع"
تمام؟ القرآن "ثلاثون جزء" يعني مئتين
وأربعين ربع.

أدي بداية الخطّة، أنا عارف الهدف، هدفي
مئتين وأربعين ربع، هو الربع كم صفحة؟
عشان ممكن فيه ناس متعرفش، لما تقرأ قرآن
كده بتلاقي علامة اسمها ربع حزب. نص
حزب ثلاثة أرباع حزب ده "اسمه ربع".

الربع بيبقى ما بين صفحتين لتلاتة؛ ممكن
يبقى صفحتين، صفحتين وحتة، صفحتين
ونص، ثلاثة إلا حتة، ثلاثة، يعني واقع ما بين
صفحتين، وثلاثة خلاص؟ مئتين وأربعين ربع

خلاص؟ الخطبة بتقول: أنا هحفظ ربعين في الأسبوع.

يبقى أنا محتاج كم أسبوع عشان أختم؟

خطبة عادية جدًا، واضح جدًا مع نفسي، محتاج مئة وعشرين أسبوع، مئة وعشرين أسبوع بالظبط، طيب مئة وعشرين أسبوع، السنة فيها كم أسبوع؟ نقول: خمسين مثلاً حوالي خمسين أسبوع، يبقى أنا محتاج وقت قد ايه عشان أختم؟

ببساطة محتاج سنتين وحوالي خمس شهور، قل سنتين ونص. خلاص الخطبة واضحة جدًا.

أنافي سنة أولى كلية يبقى أنا، أو كنت في نص سنة أولى يبقى أنا هختم على أول سنة رابعة تقريبًا.

على أول سنة رابعة تقريبًا هكون ختمت،
طيب يعني أنا بقول: لكم ده إعراف بفضل الله
-سبحانه وتعالى- عليّ.

أنا ختمت في أول سنة رابعة، خطة واضحة
عندي ما غيرتهاش على فكرة، لا زودت ولا
قللت. تقول لي: طب ما زودتش ليه؟ رغم إن
أنا كان ممكن أزود، ما دي الخطة الثانية بقي.

🌀 **الخطة الثانية :- (خطة المراجعة)**

في مراجعة، وكل ما الحفظ يزيد المراجعة
هتزيد، فقلت لنفسى خلاص أي وقت يزيد
معي مش هحطه في الحفظ هحطه في
المراجعة وأزود في المراجعة زي ما أنا عايز
مش هزود الحفظ. خليني أحفظ ربعين في
الأسبوع مش ما عنديش مشكلة أختم سنتين

سنتين ونص، بس يوم ما أختم أنا ختمت، يوم ما أسمع آخر آية أنا ممكن أجيب لك أى آية في القرآن، لأن أنا بدأت ما بزودش حفظ خالص بزود مراجعة بس، بحفظ ربعين وراجع ربعين، بقيت بحفظ مثلاً ربعين في الأسبوع تمام؟ وراجع في اليوم ربعين بحفظ ربعين في الأسبوع، الوقت بقى فيه زيادة.

براجع أربع أرباع في الأسبوع في اليوم ربعين في الأسبوع مع خمس أرباع في اليوم، ست أرباع في اليوم، جزء في اليوم، جزء ونص في اليوم، جزئين في اليوم، مهو حفظي بيزيد مزودتش حفظ بزود مراجعة بس ليه؟

عشان الخوف اللي قولت لكم: في الأول ده، مش عاوز إن أنا حفظي بعد كل ده يبجي يوم القيامة "اقرأ وارتق ورتل" هلاقي، أصل أنا

عاوز أراجع خليك، مفيش مصاحف هناك،
مفيش شيخ هيساعدك تمام؟ فتخيلوا مثلاً مفيش
خطة تعالوا نقول: خطة تانية(خطة تانية).
هحفظ صفحة فى اليوم صفحة فى اليوم، خطة
واضحة جداً معايا صفحة فى اليوم يبقى أنا
محتاج كم يوم؟ هامين هيقول: لانا هحتاج كام
يوم؟ أوعى تقول لى مئتين وأربعين هدبحك
هههه.

محتاج ست مئة يوم، هو المصحف ست مئة
صفحة= محتاج ست مئة يوم.

ست مئة يوم يعنى ادايه؟ يعنى سنتين إلا
شويه ياعم سنتين.

✍ يبقى خطة صفحة فى اليوم تساوى
(سنتين) .

لكن هختم فى سنتين (خطة واضحة) ،
وهراجع أد ايه؟

هقول: لكم تراجعوا أد ايه، لا أنا هحفظ نص
صفحة فى اليوم ماشى، أصلي أنا حفظى
ضعيف، أو أنا ست كبيرة، أصلي أنا مذكرتي،
أصلي أنا مشغولة، مفيش مشكلة، أنا معنديش
مشكلة، أنا مش هقول لك: تحفظ أد ايه.

بس أنا عايز أعمل حاجة وخلص، وأستمر
عليها، معنديش مشكلة تحفظ نص صفحة فى
اليوم أنا موافق، الفرق بين خطتي، وخطتك
إنها هتبقى الضعف، بس نص صفحة فى اليوم
يساوي أنا محتاج "ألف ومئتي" يوم ، "ألف

ومئتي" يوم يعني "أربع سنين " عادى "أربع سنين".

معلش فى ناس هنا ملتزمه من خمسة عشرة سنة، وناس ملتزمة من عشر سنين، أربع سنين بيعدوا، بيعدوا هوى.

حط نص صفحة في اليوم حفظ ما عنديش مشكلة، المراجعة ايه؟ اديني مراجعة، شوية مراجعة، تعالوا أقول لكم بالمرة خطة المراجعة بقى، قبل ما أدخل في حنة مفيش شيخ، هنقول خطة المراجعة، أحب الأعمال إلى الله أدومها وإن قل، المداومة.

صدقوني مع المداومة هتلاقي الحفظ ممكن يزيد، يعني مش لازم تعملوا زيي، أنا واحد اتفقت مع نفسي مش هزود حفظ خالص، ممكن واحد يقول لك لا أنا عندي وقت عندي

وقت أزود المراجعة وأزود الحفظ زود! ما هي المكنة لما هتلاقيها بتجيب معك أسرع - يعني الصفحة اللي كانت بتتحفظ في ساعة بعد ما أحفظ جزئين ثلاثة أربعة كده مثلاً هلاقي نفس الصفحة دي بقت بتتحفظ في ساعة إلا تلت، صح ولا غلط؟ أي حد حفظ؟ واحد ماشي يقول لك لا دي الصفحة دي أنا بقعد ساعة في الصفحة، أنت هتقعد ساعة في الصفحة أول شهر بس، أنت متخيل هتقعد كده للأبد!

ده أنت أول صفحة هتفظها في القرآن هتقعد فيها ساعة وساعة ونص؛ لكن في نص القرآن هتلاقي الصفحة بتتحفظ في نص ساعة، في ثلاث أرباع القرآن هتلاقي بتحفظ في ثلث ساعة،

في الآخر هتلاقي الصفحة اتحفظت في عشر
دقايق، صح ولا مش صح؟

فما تقيسش على أول صفحة خالص، كمل {إِنَّ
هَذَا الْقُرْآنَ يَهْدِي لِلَّتِي هِيَ أَقْوَمُ} وفيه بركة
وفيه توفيق وفيه إعانة من الرب، ولما تيجي
ربنا يرى منك الصدق تلاقي وضع تاني، بس
أنت ما بدأتش أنت مش ماشي أصلاً، ابدأ
هتلاقي التيسير.

أنا أعرف ناس، سيبك من الناس أنا كنت
أصلاً يوم ما بدأت أحفظ قلت خاتمة ايه؟

ماشي ختمة، مش ختمة بس أنا أصلاً أختم
مين؟ أنا أختم؟ أحفظ القرآن ده كله؟ كل القرآن
ده أحفظه ازاي؟ أحفظ المصاحف دي كلها؟
قالوا لي لا المصاحف دي كلها شبه بعض
فقلت ماشي الحمد لله، ماشي بس برودو

المصحف ده كتير، هحفظ ست مئة صفحة
ازاي؟ يا عم ابدأ بس ملكش دعوة.

وتك تك تك تك أنا كنت أقدر أحفظ في
الأسبوع، كنت أقدر أحفظ ربع في اليوم، بعد
نص القرآن كنت أقدر أحفظ ربع في اليوم،
عادي أنا كنت هقعد بسرعة غير عادية بعد
كده خلاص بقيت أحفظ الصفحة دي ابتدت
تلت ساعة بالكثير الصفحة بتتحفظ، يعني
ممكن أقعد في ساعة أحفظ ثلاث صفحات؛
بس أنا دماغي كانت كده، دماغي أنا قلت ايه؟
خليني أحفظ حاجة ثابتة ووقت عندي يديني
مراجعة المراجعة بالنسبة لي أهم.

تاني فاللي عايز أقوله ما تخشش بقى على
خطه المراجعة، فهمنا بقى إن أنا عايز خطه
حفظ وخلاص هي الخطه مش مشكلة؟

المهم هي خطة واضحة المعالم ثابتة مناسبة
لوقتك، مناسبة لظروفك تعتمد فيها على الله
ترجو فيها البركة والتوفيق.

ومع الوقت صدقني الخطة دي هتزيد
وهتتحسن وهتحلو بس أنت مش مركز معنا،
ما أنا حفظت المصاحف كلها.

أنا حافظ كل المصاحف اللي في العالم هات
لي أي مصحف أسمعه لك.

خدت بقى المراجعة، ودي أخطر حاجة
بالنسبة لي؛ لأن دي اللي حسبتها معك -يعني
أنا في الحفظ قلت لك على راحتك، اعمل اللي
أنت عايزه تحفظ صفحة في اليوم، تحفظ
صفحتين في اليوم، تحفظ نص صفحة في

اليوم ما عنديش مشكلة، ما بحفظش باليوم، فيه واحد يقول لك لا أنا بحفظ كل ثلاث أيام ربع، أنا بقعد أجيب الربع مرة واحدة، ما عنديش مشكلة، ما عنديش مشكلة.

أنا بقعد في الأسبوع مرة بجيب ربع، ما عنديش مشكلة، بس أنا عندي حاجة واضحة المعالم، أقدر أقول هختم امتي؟ خلاص؟ لكن في المراجعة تعال لي بقي، المراجعة: هي أخطر شيء في علاقتك مع القرآن أخطر حاجة في علاقتك مع القرآن.

المراجعة، ما يهمنيش تختم القرآن على فكرة، والقراءة دي اقرأ بقي يعني المراجعة.

المراجعة، المراجعة للأسف دي أقل حاجة بنعملها، وأكثر حاجة ما بنهتمش بها، وخذوا بالكم الشيطان.

(فائدة جانبية كده) الشيطان يقول لك ايه الناس
اللي فاهمين يقول لك الشيطان عايز يظفر من
الإنسان بأي شيء، لو ما قدرش يوقعه في
الكفر يوقعه في الكبائر، ما قدرش يوقعه في
الكبائر يوقعه في الصغائر ما قدرش بيوقعه
في الصلاة، مقدرش يوقعه في الصغائر يخليه
يسيب مستحبات، مقدرش يخليه يسيب
مستحبات، يخليه يقدم المفضل على الفاضل؛
يعني ايه يقدم المفضل على الفاضل؟

يعني: يحاول يخليه يعمل الحاجة ويسيب
الحاجة الأهم. بيحصل ايه؟ أقول لكم أنا بقي
بيحصل ايه، معلش أنا عايز ناس تقولي صح
ولا غلط، أنا حفظت شوية قرآن، ثلاثة أرباع
أجزاء.

قاعد أنا سڤنت حفظت البقرة وآل عمران،
مكنتش براجع كويس، مكنتش براجع كويس
وعايز أكمل حفظ وأنا عارف إن فيه مراجعة
فيه خمس أجزاء واقعين مني بيحصل الآتي
في حاجة اسمها الهروب الجميل.

■ ايه الهروب الجميل ده؟

الهروب الجميل ده إن أنا بقعد أضحك على
نفسي واطبطب على نفسي واشتغل نفسي بأن
أنا أكمل حفظ وكمآن بزود الحفظ بجري!

عايز احفظ عايز انجز واقعد أوهم نفسي أنا
مبراجعش عشان أنا عايز انجز في الحفظ،
انجز وبعد كده هراجع، أنت بتضحك على
نفسك.

■ واحد تاني أنا مايراجعش بس بقرأ كتير،
بقرأ كتير، بقرأ كتير أوي، أنت بتضحك على
نفسك.

أنت بتهرب من المراجعة بس أنت عايز
تهرب من غير تأنيب ضمير عايز تقول ايه أنا
مش وحش أنا يعني بعمل حاجات كويسة، هي
حاجات كويسة طبعًا اقرأ قرآن جميل، أحفظ
جميل بس فيه فرق بين أنا بقرأ أو أحفظ و فرق
إن أنا باهرب من المراجعة و كمان بضحك
على نفسي وبعزي نفسي بإن أنا لى علاقة
بالقرآن، فى علاقة مع القرآن بس أنت فى
مأساة بتكبر وأنت مش واخد بالك، فى مأساة
بتكبر وأنت مش واخد بالك.

جُرح قاعد تاخد له مسكنات وهو بيكبر، تاخد
مسكنات وهو بيكبر ومرة واحدة هينفجر فيك،

هقول لكم بقى اللي هيحصل؟

أقول لكم على اللي هيحصل واللي أنا شفته.

أنا بفضل الله بفضل الله أنا سنين حياتي بحفظ قرآن.

يعني سيبك من علاء الداعية لأ، أنا في جانب
تاني في حياتي تحفيظ قرآن معناها يعني
حاجات خاصة جدًا مش بفلوس يعني، بس أنا
قصدي يعني أنا لي خبرة في المجال.

أنا أعرف ناس كان مصمم يكمل حفظ وأقوله
نوقف ونراجع يقول لي لأ لأ سبني أنا نفسي
أختم، نفسي أختم، نفسي أختم.

ماشى، يلا كان بيحيب كميات مهولة في
الأسبوع، كان ممكن يحفظ جزء في الأسبوع.

ويجي يسمع وأنا أقوله أخرتها مش حلو
هتندم، أنا هريحك هسمع لك بس اللي أنت فيه
ده مش صح، اللي أنت فيه ده مش صح، أنا
منصحكش بكده.

أنا عندي احفظ قليل وراجع كثير يقول لي: لأ،
سبني أنا هختم بس أول ما أختم بقى بص
أوراد وهاعمل لك المراجعة كله هيتظبط بس
نفسى أختم.

ماشي وقعدنا وراه بقى، وشوفت حاجات كثير
من كده بقى، لغاية فعلاً ما ختم، بعد ما ختم
هتروح فمين بقى؟ الهروب الجميل خلص.
واجه بقى يا معلم واجه، اكتشف إن هو فيه
مأساة، فيه مأساة مش عارف يلها بقى، مش
عارف يل الدنيا خلاص.

الدنيا اتفرطت منه، علاقته بالقرآن ايه دلوقتي
وقفت.

علاقته بالقرآن اتجمدت لا مفيش حاجة
يحفظها ومش عارف يراجع ومش قادر يواجهه
والموضوع بقى مرعب الموضوع كبر وقف.

بقت علاقته بالقرآن زي أي حد بيقراً من
المصحف بس، بيقراً من المصحف.

متزعلوش مني يعني الكلام ده مش هتسمعه
محدث هيقولها لك يعني.

يبقى أنا بالنسبة لي موضوع المراجعة
موضوع مصيري تمام؟ معلش أنا تعبان
شوية، تمام

يبقى عشان نبدأ بقى صح بقى، عشان نبدأ
صح.

أنا هتكلم في واحد لسه ايه هبدأ أو واحد لسه
في الأول وأنا هلقه.

وبعد كده أتكلم اللي هو أصلاً في المأساة دي
بقى، اللي هو في المأساة دي يعمل ايه بقى.

اللي لسه في الأول أو ممكن نلحقه أو لسه في
أول المشكلة وحافظ شوية بس يعني لسه
والعملية في أول ثلاث أربع أجزاء وقرب
وهو داخل بقى على المأساة نقف، لازم خطة
مراجعة مع خطة الحفظ، ايه هي خطة
المراجعة؟ خطة المراجعة كالتالي: خطة
بسيطة جداً بردو، ودي الخطة اللي أنا حطيتها
لنفسى، نفس الخطة.

🌀 خطة بسيطة جدًا جدًا مفيد جدًا أي حاجة،
هي عبارة إن أنا مطلوب مني كل يوم أراجع
سُبع اللي أنا حافظه بس.

👉 بس سُبع اللي أنا حافظه يعني أنا حافظ
اد ايه؟

أقسم على سبعة، هو ده ورد مراجعتك يعني
لو أنا حافظ سبع أرباع مثلاً يبقى لازم يكون
في اليوم براجع ربع، حافظ سبع أجزاء يبقى
لازم في اليوم براجع جزء، حافظ أربعة عشر
جزء، يبقى في اليوم راجع جزئين وده كان
أغلب فعل الصحابة، كانوا يختمون في
أسبوع، -براجعوا في أسبوع- ده أغلب حال
الصحابة، ودي الخطة المثالية.

أنا مش عايز أقل من كده. أقل من كده كثير،
مش لازم راجع في أسبوع.

دي مثالية وأقول لكم ازاي مثالية، أي حاجة
بتجيبها في أسبوع ما بتتنساش أبدًا.

هاضرب لكم مثال وقولوا لي صح ولا غلط؟
قولوا لي صح ولا غلط في كومت؟ كلنا
حافظين سورة الكهف صح؟ تقريبًا كلنا
حافظينها، حد فينا قعد يحفظها؟ لأ، احنا مجرد
بنسمعها أو بنقرأها كل أسبوع، لقينا نفسنا بعد
فترة حافظينها تخيل أنا أصلًا مش قاعد
أحفظها ولا قاعد براجعها، ولا أنا متعمد
حفظها بس أنا حفظتها مجرد ما هي اترددت
عليّ كل أسبوع حفظتها.

✍️ مثال ثاني: سورة السجدة اللي بينزل
يصلي في مسجد الفجر يوم الجمعة والإمام
بيصلي بالسجدة والإنسان، هتلاقي نفسك بعد
فترة حفظت السجدة والإنسان مع إنك
مبتراجعهاش ولا بتقرأها مجرد بتسمعها كل
أسبوع تلاقى نفسك بترد الإمام لو غلط رغم
إن هو أنت مش حافظها.

فاللي عايز أقوله إن أسبوع دي فترة خطيرة
جدًا.

اللي يقدر يجيب حفظه في أسبوع أضمن له
أنه لن ينسى منه حرفًا، لن ينسى منه حرفًا
واحدًا أبدًا.

هتقول لي طب لو الحفظ كتر؟ مالو الحفظ
كبر بتحافظ أربعة عشر، عشرين جزء

معنديش وقت أراجع ثلاثة أجزاء في اليوم أو جزئين ونص صعب يا شيخ مش هقدر والله ما هقدر ظروفي متسمحش.

🔗 طيب المستوى التاني من المراجعة أنا

هديك ثلاثة مستويات مراجعة مستوى مثالي،

مستوى متوسط، مستوى ضعيف

بس ماشي يعني يمشي أقل من كده مينفعش، هم ثلاث مستويات.

🔗 المستوى المثالي (أسبوع): خطة بسيطة

جداً أقسم اللي أنت حافظه على سبعة، هو ده مراجعتي بس، واثبت بقى على كده، طب حفظي بيزيد مراجعتي بتزيد، أنا دلوقتي حافظ ثلاث أجزاء ونص، يبقى وردي في اليوم نص جزء = أربع أرباع، لأ أنا بقيت حافظ خمس

أجزاء يبقى هسمع في اليوم جزء إلا ربع، لأ
بقيت حافظ سبع أجزاء في اليوم جزء، أهى
دي الخطة المثالية.

الخطة المتوسطة:- لو واحد شاق عليه

أسبوع ماشي، أقسم على عشرة -اكتبوا الكلام
ده حلو- أقسم على عشرة، خلاص؟ نقسم على
كام؟ على عشرة يبقى هات محفوظك في عشر
أيام ماشي؟ حلوة برودو حلوة، حلوة تتجيب
يعني هات محفوظك في كام؟ في عشر أيام،
نفس الخطة بالظبط بس بدل نقسم على سبعة
نقسم على عشرة، دي الخطة المتوسطة عشان
أراعي ظروف ناس حافظين كتير والدنيا
متعبة.

الخطة الضعيفة:- بس هي ماشية مستورة

هتبقى حافظ كويس، أقسم على أربعة عشر،

يعني تجيب محفوظك كله في اديه؟ أربعة عشر يوم، أربعة عشر ايه؟ يوم، أقل من كده لا، أقل من كده دخلنا في مرحلة الخطر، الخطر إن أنا على ما ألف وأجيب السورة دي ثاني لو وصلت لعشرين وتلاتين يوم أنا وصلت لخطر دلوقتي، خطر النسيان.

فأنا بجيب محفوطي كله في أسبوع، عشر أيام، أقصى حاجة أربعة عشر يوم، أكثر من كده لأ، ما أنصحش، أكثر من كده هنخش في النسيان، حلو؟

طيب، أنا لسه دلوقتي بكلم الشخص اللي هو لسه احنا بنلحقه، أنا لسه مكلمتش شخص اللي هو أصلاً حافظ والدنيا باظت خلاص لسه هكلمه دلوقتي، لسه بكمل مع الشخص اللي هو بنلحقه، عمال له خطة حفظ وخطة ايه؟

مراجعة، بس خطة المراجعة فيها سر، خطة
المراجعة فيها ايه يا حبايب؟ فيها سر، وهي
التفريق بين المحفوظ القديم والمحفوظ الجديد،
يعني ايه؟ في فرق بين المحفوظ القديم
والمحفوظ الجديد، يعني ايه؟ يعني أنا دلوقتي
مثلاً في الجزء السابع، أنا دلوقتي في الجزء
السابع بحفظ في الجزء السابع، ما تقارننيش يا
عم الشيخ بين الجزء السابع اللي أنا لسه
حافظه، وبين أول ست أجزاء، صح؟ صح،
لأن أول ست أجزاء خدوا حقهم شوية في
المراجعة، يمكن أنا على ما حفظت الجزء
السابع كانوا أول ست أجزاء اتراجعوا مرتين
ثلاثة، صح، بس الجزء السابع نفسه ضعيف،
فأنا باجي أراجعه بقى الأخير ده بالطريقة اللي
أنت بتقول عليها بحس إن هو دائماً أضعف

من التانيين، أنا بعاني في مراجعة المحفوظ،
آخر حاجة حافظها دي ثقيلة شوية غير اللي
خد حقه، حلو، فيه حلين للموضوع ده، فيه
حلين، الحل الأول إن أنت تكون مستعد نفسيًا
لليوم أو اليومين بتوع المحفوظ الجديد ده، وما
تزعلش لأن اليومين دول هيكونوا أصعب
يومين في جدول المراجعة، دايمًا.

يعني مثلاً مثلاً أنا براجع جزء في اليوم، وأنا
حافظ سبعة أجزاء هلاقي طبعًا ده ايه الحلاوة،
أول يوم ده أحلى يوم، لأن ده أول جزء اللي
أنا أصلًا براجعه كتير، أول يوم ده أجمل يوم،
تاني يوم جميل، ثالث يوم جميل، رابع يوم
هه، خامس يوم يا رب، سادس يوم هالاه، سابع
يوم بموت، عادي، يبقى أنا عادي أنا مأقلم
نفسي عشان ما تزعلش، أكيد مراجعة الجزء

الأول مش زي مراجعة الجزء السابع، يبقى أنا بدي وقت أكثر وأنا نفسيًا متوقع ومش متضايق وهصبر، الجزء السابع هياخد وقت، هنتعب فيه، هيبقى اليوم ده لو أنت بتراجع الجزء في ساعة، لا ده هياخد منك ساعتين، وأنا نفسيًا أصلًا مستعد معنديش مشكلة.

الاحتمال الثاني:- الاحتمال الثاني لذيذ بقى، الحل الثاني لذيذ بقى، لو تعرف تعمله ده أحلى، أحلى، في ورد المراجعة اعمل وردين، ورد فيه القديم، وورد فيه آخر حاجة يعني آخر جزء آخر جزء ونص، يعني حسب ما أنت شايف الحطة اللي هي ما خدتش حقها، الحطة اللي ما خدتش حق مراجعة اللي أنت حاسس إن هي ايه ما ينفعش تبقى نفسها، هي مش زيهم، تعمل ايه بقى؟ القديم ده ماشي في

ورده عادي، الجديد اللي هو الطري ده اللي
لسه لسه منشفش، بعمل له ورد لوحده كده
ورد لوحده مختلف عن الورد الثاني خالص،
ازاي؟ هضرب لك مثال ويا رب تركز معي،
أنا دلوقتي، خرينا نقول حافظ ثمان أجزاء،
ثمانية، خلاص؟ وردي عامل ازاي؟ ركزو
في دي، وردي عامل ازاي؟ بجيب أول يوم
الجزء الأولاني وأجيب ربعين من الجزء
الأخراني، اللي هو لسه جديد، ثاني يوم بجيب
الجزء الثاني عادي وأجيب ربعين ربعين من
الجزء الأخير اللي أنا حافظه، ثالث يوم بجيب
الجزء الثالث وأجيب ربعين من الجزء الأخير
اللي أنا حافظه، الرابع هكذا على ما أخلص
السبع أجزاء اللي أنا حافظهم، هكون راجعت
الجزء ده مرتين، يبقى هو خد حق ضعف

الناس، بقى القديم بيتراجع مرة كل سبع أيام أو كل عشر أيام والجديد اتراجع مرتين في نفس المدة، يبقى الهدف إن أنا الجديد اللي أنا حكمت إن ده الجديد اللي هو جزء أو جزء ونص مثلاً، بجيبه خلال ما أنا بجيب القديم مرة هو بيتجاب مرتين، واقعد على كده كم مرة، بعد كده هيبقى جامد بقى جامد، أروح حاطه مع القديم وساعتها هيكون فيه جديد صح؟ ما هو أنا على ما أكون راجعته مرتين، ما أنا كده كده لسه بحفظ فهيبقى فيه حفظ جديد بقى فأنا هاخد اللي جمدته ده هحطه في المراجعة مع القديم خلاص لأنه نشف وأجيب الجديد اللي هو الجزء الجديد أعمل له ورد لوحده، ضعفي الورد العادي بتاعي وانشفه بعد ما ينشف أحطه مع القديم وأروح ماسك

الجديد أعمل له مراجعة لوحده فاهمين ولا
ايه؟

يعني الفكرة أنا بأعمل مراجعتين:- مراجعة
للقديم براجعه كل أسبوع مرة أو كل عشر أيام
مرة، الجديد لأمش بعمل نفس الحاجة،
براجعه أكثر شوية -يعني ممكن كل أسبوع
مرتين- ورد لوحده ملوش دعوة بالورد ده،
كل أسبوع مرتين- ثلاث مرات بحيث أنشفه
شوية، بعد ما ينشف أروح حاطه مع إخواته
القدام عادي بقى ساعتها هيبقى فيه جديد،
ساعتها على ما عملت كده بقى فيه جديد. بقى
فيه محفوظ جديد اعمل له ورد لوحده فأنا
بنشف وأحطه هنا. وبعد كده الجديد اعمل له
ورد لوحده وبعد كده ينشف أروح حاطه مع
القديم وهكذا.

هتلاقي نفسك بقى لو مشيت كده يوم ما تختم
هتلاقي نفسك تقريبا حافظ كل القرآن تمام؟

بس عندك مشكلة في آخر جزئين بس، آخر
جزئين حافظهم هم يعني شوية كده فهمتوا؟
طيب مش عارف أكمل ولا ايه؟ لسه كتير،
كتير في كلام كتير، واحنا قعدنا ساعة كده،
شكلنا هنكمل المرة الجاية.

احنا النهاردة اتكلمنا على كده، أنا عالجت
النهاردة ضعف الإرادة اتعالجت خلاص،
تمام؟ عدم وجود خطة للحفظ قلناها. وحطينا
خطة للحفظ وخطة للمراجعة، وقلنا خطة
الحفظ اعمل خطة بأي مدة بأي زمن ما
عنديش مشكلة؛ لكن خطة المراجعة أنا اللي
هقول لك هتعملها ازاي، سبع أيام عشر أيام

أربعة عشر يوم زي ما قلت لكم تمامًا وازاي
براجع؟ ازاي بقى بفصل القديم عن الجديد؟ أو
بحطه كله في مراجعة واحدة واستحمل يومين
مراجعة اللي بيبقوا تقال أوي صعبين معلى
استحملهم وخلّاص، يا إما بتفصل في محفوظ
قديم محفوظ جديد محفوظ القديم بيتراجع
عادي، المحفوظ الجديد بياخذ اعتناء أكثر لغاية
ما يبقى حلو حطه مع القديم وهكذا.

صدقني يوم ما هتوصل هتبقى جامد ساعتها،
هتبقى حافظ بجد احنا لسه عندنا كذا مشكلة:

❌ عدم وجود شيخ ودي هنحلها المرة
الجاية.

مشكلة الشخص اللي هو أصلًا في المشكلة -
يعني أنا كل ده بكلم واحد مش في المشكلة،

واحد لسه بيحفظ جديد بقول له بلحقه قبل ما
يقع في المشكلة- لأ في ناس أصلاً حافزين
ونسووا خلاص، هنعمل ايه؟ ده لسه المرة
الجاية.

بس أنا هقول آخر كلمة عشان أكمل النقطة دي
ولا بلاش خليها المرة الجاية، لسه بقى هقول
تريكات شوية مهمة في الحفظ والمراجعة
بقى، يعنى أنا بردو كل ما أنا بنزل أحط
عنوان وبعد كده أكمل في التفصيل.

المرة اللي فاتت قلنا عايزين نحفظ قرآن بس
وسبتكم، جيت النهاردة قلت لك ضعف الإرادة
يتحل ازاي؟ قلت لك خطة الحفظ تترسم ازاي؟
خطة المراجعة تترسم ازاي جوة بقى خطة
الحفظ جوة خطة المراجعة في جوة نصايح،
نصايح وتريكات في الحفظ لو ما عملتهاش

هتتعب، هتسهل لك هريحك، وتريكات في
المراجعة برردو لو ما عملتهاش مش هتعرف
هي المشكلة فين، هو أنا ليه متكعبل؟ فلسه
المرة الجاية هنتكلم في أسرار في الحفظ،
أسرار في المراجعة.

المرة الجاية هنرد على حنة مفيش حد أحفظ
معه.

المرة الجاية هنتكلم مع الشخص اللي هو أصلاً
حافظ من زمان والدنيا وقعت معه أعمل ايه؟
أواجه المشكلة دي ازاي؟

المرة الجاية هنحط بقى شوية قواعد كده أحفظ
منين؟ ابدأ الخطه منين؟ أبدأ من جزء عم،
تبارك البقرة طب اعمل ايه؟ وايه الصح وايه
الأفضل؟ طب والتجويد طب والشيخ صفاته

ايه؟ طب من الأول تجويد تمام ولا أسئلة كتير
مستحيل أخلص الكلام النهاردة، ازاي؟

هنكمل المرة الجاية، أنا مش عارف يعني أنا
كان خطتي إن أنا هاقول كل حاجة النهارده
بس طبعًا مستحيل كالعادة يعني، بس أنا أتمنى
من الله النهاردة بس طلعت بناس خدوا قرار
هيحطوا خطة بعد ما أقفل اللايف ده هيبدا،
أبدأ وخلص لسه في كلام هقوله في نصايح
تانية بس ابدأ، ابدأ وجرب واغلط عشان
المرة الجاية لما أقول لك النصايح تقول آه
صح أنت جاوبتني، ده أنا بقالي أسبوع الحثة
دي هي دي أنت كده حليت لي مشكلة، أنا
عرفت ليه ما كنش الدنيا بتزبط معي؟ حلو،
جربوا الأسبوع ده حط خطتك نفذها بأي
وسيلة، وقيم أخطاءك واسألني المرة الجاية قل

لي حصل كذا واحلها ازاي؟ وأنا هاقول لك
من عندي وبعد كده هتلاقي نفسك بقى خلاص
المرة الجاية كل الإجابات هتبقى عندك،
هتلاقي نفسك بقى طائر بقى بعد كده، اتفقتنا؟
استفدتم النهاردة؟ مبسوطين؟ ناويين؟ المرة
الجاية عايز ناس كتير تحضر، كلكم تحضروا
وتجيبوا ناس حتى اللي ما حضرش اللايف ده
خلوه يشوفه، وييجي الجاية برده، اتفقتنا؟

ربنا يا رب يا رب يرزقكم ختم القرآن وحلاوة
القرآن ويرزقهم العمل بالقرآن -ودا أهم- ويا
رب تحضروا مشهد اقرأ وارثق ورتل ويا
رب ما تنسوش آية من محفوظكم يا رب.

**أحبكم في الله ،لايك على الصفحة سلام عليكم
ورحمة الله.**